

ԱՌԱՋԻՆ ԳՍԳԱՓԱՐԱԿԱՆ ԱՎԱԶԱԿԸ
ՀԱՅՈՅ ՄԵՋ

ՄԵՐԿԵ-ԿՈՒՂԱՔԻ ՏԵՐ-ՄՋՐԱԽ
1791—1792 թթ.

Պետք է տարբերել գաղափարական ավազակին ավազակ գաղափարականից:

Ավազակ գաղափարականը ձևանում է, թե ծառայում է գաղափարին, մինչդեռ իրոք սոսկ կողոպտիչ է: Նա իդեալի դասալիքն է՝ վարագուրված կեղծ բարեմասնություններով, ծայրահեղ եսասեր ու հնարագետ ճիզվիտ՝ բազմազան կերպարանափոխություններով:

Գաղափարական ավազակն, ընդհակառակը, խանգարում է հասարակական անդորրությունը և ոտնատակ տալիս տիրող օրենքները գաղափարական նպատակով: Այս տիպն իդեալի մարտիկն է, թեև կռվի ու բողոքի ժամանակակից ձևերին չի հետևում. սա գործում է լուի այլասիրությունից զրոգված և հանդես գալիս իբրև ասպետ առանց վարագուրվելու:

Ավազակ գաղափարականությունը հատուկ է բոլոր ժամանակներին. չի հնանում, այլ միշտ ժամանակակից է, հանդես է գալիս ամեն դարում, թեև տարբեր անուններով: Մեր հասարակության պատմության վերջին տարիները, հատկապես համաշխարհային պատերազմի տարիներն ու մանավանդ Հայաստանի հանրապետության առաջին տարին ավազակ գաղափարականության ոսկեդար կարելի է համարել, ոսկեդար, երբ, ինչպես ասել է մեկը, «ումը ձեռք ձգեցինք, գող դուրս եկավ»:

Սրան հակառակ՝ գաղափարական ավազակությունն անցած երևույթ է և հատուկ չէ հասարակության զարգացման բոլոր աստիճաններին: Գաղափարական ավազակը հանդես է գալիս այն շրջանում, երբ ժողովրդական ինքնագիտակցությունը քնած է, չկա կազմակերպված լայն պայքար հանուն ոտնահարված իրավունքի ու շահագործվող բազմության, չկան քաղաքական-հասարակական հոսանքներ ու կուսակցություններ: Այս տիպը հնազանդության ծովի մեջ բողոքի ու ըմբոստություն առաջին ու միայնակ ճիչն է: Սա չի գտել